



**Portugal-i UEFA Nations League kokogo**

**Hamas tanishir Mohammed Sinwar temang jangjatetogo: Israel**



## PDA-i NDA nem tenüngsang agütsür

**Dimapur, June 9, 2025 (TYO):** Prime Minister Narendra Modi-i aniba National Democratic Alliance (NDA) küm 11 ajungba aser kümsük tasembuba nung küm ka ajungba atema tenüngsang agütsür ta People's Democratic Alliance (PDA)-i metetdaksüogo.

Onoki linük den külemi aser NDA den yariteperem ajak den pelasemer. NDA lenisüba aser alliance partners ajanga ajak terenlok, külem tebilemtsü khuret aser sorkar ketdangsübaren takang tenangzükba nung inyakba atema tenüngsang agütsür ta PDA-i ashi.

Nagaland aser linük nung alirtemi NDA mangdang dak temulung alemba atema pelar ta parnokisa ashi.

Chief Minister Dr. Neiphiu Rio lenisüba kübok NPP, JD (U), LJP, NPF, RPI aser Independent MLA pezüi nungita NDPP-BJP teloktep kübok PDA sorkari

tesüiba küm tenet tashi Nagaland nung terenlok mapa inyaka arur. New Delhi nung NDA sorkar den tesentaktep tajung ayuba ajanga Nagaland nung alirtemia linük yangerba nung shilem tajung agir ta PDA Govt. of Nagaland Spokesperson & Minister K.G. Kenye-i sangdong ka nung ashi. NDPP Media & Communication Committee-ia tanga sangdong ka nung Prime Minister Narendra Modi lenisüba kübok National Democratic Alliance (NDA) küm tenet abensaba aser kümsük tasembuba nung küm ka ajungba atema tenüngsang agütsüogo.

Prime Minister lenisüba kübok NDA-i India kanga renlokdaaksüogo aser alima nung fourth largest economy kümdaaksüogo. NDA lenisüba kübok tarutsü anogotem India tashitaitba akümtsü amanger ta NDPP-isa metetdaksü.

## ASUD-i Dimapur nungi IBIs meyipa yoktsü aser ILP akangshitsü ayongziker

**Dimapur, June 9, 2025 (TYO):** Ao Students' Union Dimapur (ASUD)-i Dimapur Deputy Commissioner dangi Illegal Bangladeshi Immigrants aser Inner Line Permit (ILP) system atema shidi ka zülüogo.

Sorkari bendangertem aruba tip atemtsü aser lisopurtem temete, maitsü aser rongsen kümzuka ayutsü mapa inyakba atema tenüngsang agütsür ta ASUD-i ashi.

Dimapur nungi Illegal Bangladeshi Immigrants (IBIs) meyipa yoktsü aser ILP system akangkanga inyaktsü mepishir. Iba maparen ya local administrations, civil society organizations, student bodies, aser youth organizations den amalitepa inyaktsüla ta ASUD Tir Imnatemu Pongen aser Tongti Tezülur Tongpannechet Kichu nati sangdong ka nung ashi.

IBIs meyipa yoktsü aser ILP system akanga inyaktsü atema

Centralized System ka alitsüla. Iba centralized system nung ILP registration, verification, aser monitoring aser guarantors jangjatsü atema maparen alitsüla ta ASUD-i ashi.

Bangdak department ajanga ILP alema arurtem aser Illegal Bangladeshi Immigrants mapang shitak nung meyipa yoktsüla. Maneni IBIs jenokdaaksür aser kümzuka ayurtem nem tapet temerenshi agütsütsül ta ASUD-isa ashi.

Parnokisa ILP maparen jungjunga inyaktsü atema bangdak department, local administration, Civil Societies, kaketshir aser lanur teloktem tsüngda amalitep tajung alitsü indang shiogo.

Maneni, mass media aser local administration ajanga ILP indang osang prokshitsüla ta ASUD-isa Dimapur Deputy Commissioner dangi züluba shidi nung shia lir.

## CTAN & NNQF-i mapang züngzüktsür

**Dimapur, June 9, 2025 (TYO):** Combined Technical Association of Nagaland (CTAN) aser Nagaland NET Qualified Forum (NNQF)-i state sorkar dang July 12, 2025 matongdang higher education mapatem NPSC ket nung agütsütsü metetdaksüogo.

Nagaland sorkari December 17, 2024 nü sangdong agütsüba meyipa agiba sülen mapa kecha meinyaki dang arur. April 30, 2025 nü iba tetuyuba agütsüba sülen requisition process inyaktsü ta teimla tulu liasü ta CTAN aser NNQF-i Nagaland Chief Secretary dangi züluba

shidi nung shia lir. "Ajisüaka tang tashi nung High Powered Committee (HPC) mesüra sorkar nungi iba atema telangzüba kecha mali" ta parnokisa ashi.

July 12, 2025 tashi nung higher education mapatem bangdakpur ket nung magütsüra onoki ozüngi melaba ama lungkak aittsü aser iba sülen langka danga atalokra iba atema onoki tebilemtsü khuret mabentsü ta CTAN Convenor Er. Meshenlo Kath aser NNQF Core member Miss. Videkhono nati shidi nung shia lir.

## Nagaland nung 7 buba World Food Safety Day mungogo



**Kohima, June 9, 2025 (TYO):** Department of Health & Family Welfare, Nagaland-i 7 buba World Food Safety Day ayongzuka mungogo.

Chandmari Higher Secondary School, Kohima nung "Food Safety: Science in Action" omen nung ajemdaker iba sentong agi.

Iba sentong ya food safety aser foodborne illnesses nungi jenbua alitsü osang prokshitsü atema ayonga agi.

Kümshia iba anogo ya June 7 nü amunger saka taküm sodi anogo denjiba agi tanü ang ayongzuka mungogo.

"World Food Safety Day ya 2019 nungi kümshia June 7 nung munga arur. Iba anogo ya human health, food security, aser economic growth nung food safety indang nenshitsü atema amunger" ta Commissioner & Secretary of Health & Family Welfare, Anoop Khinchi-i ashi.

Temang asoshi chiyungtsü putepa achitsü atema producers, regulators, aser consumers külemi yaritepa aotsüla ta pai ashi.

"Science-i food safety

atema kanga tongti süa bilema inyaker. Research aser innovation ajanga chiyungtsü raksaba nungi noktangtsü aser food quality tajungba asütsüba nung yariteper" ta Anoop Khinchi-isa ashi.

Kümshia alima nung chiyungtsü tamajung achiba ajanga nisung 600 million shi shiranger, 420,000 shi taküm samar aser 33 million healthy life years akoksar ta World Health Organization-i asadangteta lir ta paisa ashi.

Food supply tajung agütsüba nung microbiological analysis, preservation methods, packaging innovations, aser modern processing techniques kanga tongtipang. Para Medical, Kohima nung aliba State Public Health Laboratory ya FSSAI standards kübok food sample testing atema designated center lir.

Iba sentong nung consumer education shilem ka liasü aser iba nung food hygiene, proper handwashing, temperature control, safe storage, aser

reading food labels amala tesayubatem agütsü.

Department of Health & Family Welfare-i Anti-Obesity Drive atema special session ka agidang HFW HoD Dr. Mereninla Senlem-i India nung obesity indang osang lemsatop.

"India nung unhealthy diets, sedentary lifestyles, aser diabetes o hypertension amala non-communicable diseases (NCDs) teimba akümba ajanga nisungtem kanga chizüker. India nung tetsür 24% aser tebur 23% tashi overweight mesüra obese lir ta NFHS-5 data ajanga bushitetogo" ta Dr. Mereninla-i ashi.

Prime Minister Narendra Modi-i tawa Mann Ki Baat nung jembidang public awareness aser lifestyle temelenshi ajanga obesity khuret azüoktsü indang ashi aser pai edible oil ajema achitsü indang shia liasü ta Dr. Mereninla-isa ashi.

Iba sentong nung mendenji CHSS Assistant Teacher Marsenla liasü aser CHSS Lower Section Supervisor Bendang-i sarasadem.

## NH-29 anasa aliba yimtsüngtemi lungkak aittsü

**Dimapur, June 9, 2025 (TYO):** National Highway Area Village Council's Forum-i June 11 nü parnok telongtet nung ghonda 6 dokantem shibangtsü ayongzükogo.

Telungpur telok balala tsüngda raraba aser Ceasefire Ground Rules (CFGR) alema inyakshangshiba anema NHAVCF-i iba lungkak aitba sentong ayongzüköer.

NHAVCF ya 4 lane NH-29 nung yimtsüng 13 agi tentetba telok ka lir.

June 11 anepdang 6:00 ako nungi anüngdang 12:00 ako tashi parnok dokantem shibangtsü ayongzükogo. Iba lungkak aitba tenüng nung parnok telongtet nung dokan aser shishilembadak ajak nung wako tanak ayutsü ta

parnok metetdaksü.

NHAVCF-isa kasa tangatetba aliba yimtsüngtem, shishilembar teloktem aser Nagaland nung urban local bodies-i dokantem shibanger pusema nungittsü mepishia metetdaksüogo.

May 23 nü Unity Village nung tesempatsü mapa inyak aser Unity Village Council-i iba dak sendakba nung FIR ka benoker nisungtem tenüng shiaka tang tashi parnok pua marutet lir ta NHAVCF-i ashi.

May 23 nü NSCN/GPRN (Khango) Vice President-i NSCN/ GPRN (R) Finance Kilonser'er ki mita aoba sülen iba sentong agitsü ayongzükogo.

Telungpur teloktemi India sorkar den tenangzüktep balala agia liaka parnok teti Ceasefire

Ground Rules alema inyakshangshir ta NHAVCF-isa ashi.

Sorkari lemzüksüba ceasefire monitoring offices ya ozüng alema inyakshangshirtem jenokdak kümogo aser ozüng amertemi tenokdangba balala aliba ajanga item tesemi mouteter ta parnokisa ashi.

Telungpur teloktemi Naga public dang ozüngi memelaba tax meshir, civilian pur aoer aser reshikangshir aser tetsübu den ozüng maliba tensa kümdaaksür ta NHAVCF-isa metetdaksü.

October 31, 2019 nü yimjung olemtep tembangba sülen India sorkari Naga yimten tebilemtsü atema ola madoki dang aruba aitsür ta parnokisa ashi.

## Kohima nung Coffee Canvas sentong ayongzüka agi



Capital Cultural Hall, Kohima nung June 9, 2025 nü Coffee Canvas sentong alidang tangokba noksa ka nung Advisor, Land Resources, G. Ikuto Zhimomi aser ketdangsürtem angur.

**Dimapur, Aami/June 09 (TYO):** Department of Land Resources ajanga The Coffee Board of India aser AIC-CCRI-CED den lungjemer June 9, 2025 nü Capital Cultural Hall, Kohima nung "A journey from Farm to Global Market" omen nung ajemdaker Coffee Canvas sentong ayongzüka liasü.

MLA & Advisor, Land Resources, G. Ikuto Zhimomi-i iba sentong nung jembidang alima tesem balala nung Nagaland indang coffee industry meteta aliba aser nukla tulu aliba indang lemsatapa liasü.

Alima nung tzü sülenbo timtiba ajembaji coffee ya lir aser alima nung anogoshi coffee ya cups 2.25 billion dak tema ajemer, ta pai ashi.

Assam, Manipur aser Meghalaya den Nagaland ajanga India northeast nung coffee landscape melenshidaktsüba indang jembia liasü. "Nüburtemi coffee yimya ashiba ajanga Nagaland indang coffee ya tanem-tanemi nungtugu kumtar," ta pai ashi.

State nung Department of Land Resources ajanga coffee lu ayimtsü asoshi temelenshi balala bener arutsüba indang Advisor Zhimomi-i lemsatapa liasü.

Coffee terenlok asoshi nodal agency ka ama department-i eco-friendly farming & processing methods tem amshidaktsütsü meranger, ta ashi.

Coffee lu ayimtsü asoshi Nagaland nung nukla tulu lir, kechiaser state nung ali 10.4 lakh hectares shi, tetetzü state ali tasazük shilem 62.7 nung coffee tsünütetsüsa ali tajung lir, ta Zhimomi-i ashi.

Ajisüaka tang tashinung ali 11,186.78 hectares, shilem 1.08 nung dang coffee lu ayimer, ta ashi. International sapang nunga Nagaland coffee tushia agizükba indang pai jembidang,

2021 küm South Africa nung Aurora International Taste Challenge (AITC) alidang Nagaland coffee-i silver angu aser 2023 küm Nagaland Washing Station nungi naturally processed coffee nung gold ngua liasü, ta pai ashi.

Nagaland coffee ya kilung nung amshiba oset ka amai aliba nungi kanga alakteta kuma, coffee adokdaktsüba region tem nung alizüing tonga alimai junger ta agizüketba ya state nung coffee lu ayimer aser stakeholders temi meranga inyakba temaitsü lir, ta Advisor Zhimomi-i ashi.

Government of Nagaland-ia coffee ya tongtipang 'identity product' ama agizükogo aser state indang Unique Selling Point (USP) ama kumdakja local produce asoshi market value tajungba kumdaktsütsü, ta pai ashi.

Advisor Zhimomi-i coffee lu ayimba nungi rongsenketzüng tsütsü tajangzük balala angutsüba, employment aser terenlok balala indang mangdang lemsatapa liasü.

Paisa entrepreneurs tem dang item maongka agitsü, alimai junger ta agizükettsüsa coffee brand yanglutsü aser nüburtem ajangzükdakja state revenue timba kumdaktsütsü ayongzüka liasü.

Sentong nung Director, Land Resources and CEO, SLNA, Albert Ngullie-i jembidang, 2014 küm department-i Coffee Board of India den lungjemer tang yoka aliba plantation tanaben shia arudaktsütsü aser coffee lu tuluba yimdaktsütsü meranga inyaka liasü, ta ashi.

Nagaland ya coffee tabu ana - Arabica aser Robusta junga züsentetsüsa agro-climatic conditions junga lir aser 2047 tashinung ali 50,000 hectares nung coffee lu yima alitsü department nukjidong lir ta ashi.

Department-i core principles

asem - Ecology, Employment aser Economy ajanga coffee temaba jenjangi ajungkettsü meranger, ta pai ashi.

Coffee ya agro-forestry crop ama temaba jenjang ajungkettsü meranger, kong tetongzüng mürekba ajemdaktsür, kongsang nguma arongtsü majungshir, ta pai ashi.

Employment tsütsü coffee sector yagi plantation aser processing nungi branding aser retail offering tashinung mapa agütsür, koba Nagaland nung lanurtem pei peria alitsü asoshi lenmang tesadem ka lir, ta Ngullie-i ashi.

Tang state nung hectares 863 shi nungi coffee 195.40 metric tonnes shi ongzüketeter. Ajisüaka küm ana tsüngta nung tang yoka aliba shilem 50 shi nung coffee atangtsü imlar, ta ashi.

Department-i yaria state nung coffee cafes 16, washing stations 12 aser roasteries 7 amenoka lir, mapang shia training ayongzüker aser India telungzük aser alema oa exposure trips ayongzüker, ta pai ashi.

Iba sentong nung Commissioner & Secretary, Department of Land Resources, Dr. G. Hukugha Sema, IRS ajanga pela agizükba o jembi aser Joint Director (Extn.), Coffee Board, North Eastern Region, Guwahati, Partha Pratim Choudary-i Coffee Canvas indang tongmelang agi rateta ashi.

Sentong tembanga Addl. Director, Department of Land Resources, Hekato N ajanga melepzüng o jembia liasü.

Technical session mapang AIC-CCRI-CED & SDC aser Coffee Board of India, We Brand Coffee and Hora Arts, New Delhi aser Coffee Quality Division, Eté Coffee nungi ketdangsür temi onük balala nung shisa lemsatapa liasü.

## Mokokchung district kübok tesem ajunga nung lokti nübuttsük alitsü

**Dimapur, Aami/June 09 (TYO):** Meyi mapang tonga aruba mapang renemshia aliba nung shilem ka ama June 14, 2025 anepdang 7:00 ako nungi tenzüka Mokokchung district kübok Towns/Villages/Offices ajunga nung lokti nübuttsük alitsü, ta Deputy Commissioner & Chairman, DDMA Mokokchung, Ajit Kumar Verma, IAS ajanga sangdong ka nung metetdaksü.

Anungji Mokokchung district nung aliba departments/offices/business establishment/Institutions aser nübur ajunga dang iba nübuttsük sentong nung shilem agia tzü atsünga aliba mesüdoktsü0, kilentsü aoba lenmang jana aser plastic jana agi tangbanga aliba lapoka aser colony/jila/yimtsüng lenmangtem müreka amungtsü

ayongzüker, ta sangdong ajanga ashi.

Municipal Council/Town Council kübok iba mapa inyakba pei Administrative Officers-i achayangtsü.

Yimdak-yimtsüng nung putu menden ajanga pei Administrative Officers den osang agitepa inyaktsü. Iba lokti nübuttsük mapa takok ngua inyaktsü asoshi Area Administrative Officers ajanga sentong junga yanglutsüla.

Mapa inyakba report nung geo-tag aliba noksa tangoka Deputy Commissioner, Mokokchung indang office nem tekeratiba nung WhatsApp number 8731889309 aser email ajanga agütsütsüla, ta DC Mokokchung sangdong ajangasa ashi.

## Kohima nung tzü supply agütsüba pipeline raksar lir



**Dimapur, Aami/June 09 (TYO):** Executive Engineer, PHED (Urban), Neilhoukholie Chielie-i June 9, 2025 nü sangdong ka nung, Forest Colony area nung tzü supply agütsüba pipeline tongtiba Kohima Science College leni aoba lenmang tsünglanglen kanga sashia raksar retaining wall ka telung leni tzü yimdoker, ta metetdaksüogo.

Iba pipeline ya ulura raksa, aser raksar aliba shidak

bushitettsü asoshi manual excavation inyakogo. Iba tesem yanglushiba maparen ya hopta ka shi agitsü imlar, ta sangdong ajanga ashi.

Iba tzü line raksaba agi kongshiba nüburtem dang koda masüba mapang metokmeperi arema atatsü mepishir. Akok tashi tekeratiba nung iba pipe line yanglushiba maparen tembangtsü asoshi mera ajak agia inyaktar, ta sangdong ajangasa ashi.

## DoNRE ajanga Technical Vetting committee ka kumtetogo

**Dimapur, Aami/June 09 (TYO):** Sorkari taoba mapang sangdong ka nung Department of New & Renewable Energy, Nagaland ya Nagaland nung Renewable Energy (RE) Projects/Works ajak atema State Nodal Agency (SNA) asütsü tashi agüja lir.

Anungji quality control, guarantee legitimacy aser Ministry of New and Renewable Energy-i mela aliba standard aser BIS statutory technical norms sülen anidaktsü, taila oset mesüra oset tamajung amshiba ajemdaktsütsü aser

Ministry ajanga mela aliba ama jenjang shidak lateta aser azüoktsü asoshi Technical Vetting committee ka tentetogo.

Iba committee nung züngsem tem ya Department of New & Renewable Energy nung yamai alitsü:

1. Director, NRE :Chairman
2. Additional Director, NRE : Secretary
3. Joint Director, NRE :Member
4. Deputy Director, NRE : Member
5. Project Officer, NRE : Member.



Lower Forest Colony Community Hall, Kohima nung June 7, 2025 nü baking & dessert training ayongzüka liasü, kong shisalen sayur Pelong Konyak, PEE CEE Homemades liasü aser iba training nung kiyong nungi nisung 80 shi shilem agia liasü.

## Küm 11 tsüingda Modi sorkari telemtetba aika agiogo: JP Nadda



New Delhi, June 09, 2025: NDA sorkar küm 11 ajungba nüngtem nung Hombarnü New Delhi nung aliba BJP headquarters nung BJP National Tir, JP Nadda-i osangbenertem den jembiba sülen pai exhibition ka tenzüksüdang tangokba noksa nung angur.

### New Delhi, Aami/June 09

(Agencies): Narendra Modi-i aniba sorkar küm 11 abensaba dak sendakba nung Hombarnü New Delhi nung aliba BJP headquarters nung osangbenertem senden ka ayongzüka jembidang Union Minister aser BJP National Tir, JP Nadda-i, tesüiba küm 11 tsüingda Modi sorkari triple talaq agienba, Arlla 370 agienba aser Citizenship Amendment Act benokba densema tongtambang telemtetba aika agiogo, ta ashi.

Nadda-i, Ato kilonser Modi lenisüba nung "Viksit Bharat" aser "Amrit Kaal" atema inyakba mapatemji teti atema zülüoka ayutsüla, ta ashi.

"Tesüiba küm 11 tsüingda ozü sorkari tasütait telemtetbatem agiba indang jembidi süra osangbenertem senden ka nung ajakji ashitsü tasak asütsü. Linüki Arlla 370 agentsüji tamakoktsü, ta jembi saka Modi sorkari Jammu & Kashmir nungi iba Arllaji agienogo. Lok Sabha election nung vote agütsür shilem 58.46 liasü saka Jammu & Kashmir Assembly election nungbo vote agütsür shilem 63 liasü. Iba temelenshi ya Modi sorkari tasü itta telemtetba agiba agi lir," ta Nadda-i metetdaksü.

Paisa, linük nung sensakertem taküm jenjang ajungkettsütsü atema Centre sorkari Garib Kalyan Yojana, PM Awas Yojana, Ujjwala Yojana, Jal Jeevan Mission, PM Kisan Samman Nidhi aser Ujala Yojana ama scheme aika benoka inyaker, ta metetdaksü. "Onoki nütsüng crore 40 nem life insurance aser accident insurance agütsüogo. Modi sorkar kübok nüburtemi shilem agiba kanga renlokogo, aser ibaji pa lenisüba nung nüburtemi tamang katetba agi lir," ta pai ashi.

Nadda-i, Modi sorkari Operation Devi Shakti, Operation Rahat, Operation Maitri, Operation Vaccine Maitri aser Operation Ganga ama operations aika agiogo, ta ashi.

"COVID-19 ketdangsüba tsütsü tangari tatishitsü agütsüa India-i inyakogo. Linüki junga inyakogo aser ibaji alima nung vaccination programme tulutiba aser tekeratiba liasü. COVID-19 anema India-i inyakba ama tanga linük shingaia meinyakteti liasü. India-i vaccine dose anaben- crore 220 agütsü," ta pai ashi.

Linük rongsenkettzüng ainba dak sendakba nung Nadda-i, tesüiba küm 11 tsüingda alima nung rongsenkettzüng tulutiba

linüktem rongnung India jenjang 10buba nung aliba nungi tangbo jenjang 5buba kümogo, ta ashi.

"IMF indang data tasenba nungbo asenok jenjang 4buba nung asütsü. Alima nung rongsenkettzüng tekeratiba ainba linükji asenok liasü," ta pai ashi.

Kasa senden nung Roads & Transport Union Minister, Nitin Gadkari-i, "Alima nung rongsenkettzüng tulutiba linüktem rongnung asenok jenjang asembuba akümtsü atema taruba kümtem nung India nungi export asüba teimba akümtsü. Asen Ato kilonseri India ya Vishwa Guru akümtsü, alima nung rongsenkettzüng tulutiba linüktem rongnung jenjang tasembuba akümtsü aser rongsenkettzüng dollar sen trillion 5 akümtsü mangdang yur inyaker. Iba mangdang ataloktsü atema exports teimba kümtsütsü, ibaji ajangadang aluyimba, services, aser industrial sectors aintsü," ta metetdaksü.

Kasa sentong nung Union Agriculture Minister Shivraj Singh Chouhan-i, tesüiba küm 11 tsüingda India nung alu nungi züsentetba shilem 40 agi teimba kümogo, ta metetdaksü.

## India nunger million aika sensak tia nungi anitetogo: World Bank

### New Delhi, Aami/June 09

(Agencies): 2011-12 küm nungi tenzüka 2022-23 küm tashi nung India-i kanga sensak tia nungi anitetogo, ta World Bank-i metetdaksü.

Tesüiba küm ter tsüingda India nung kanga sensak tia shilem 5.3 ajema kümdaktsüogo; 2011-12 küm linük nung sensak tia nung alir shilem 27.1 aliba nungi 2023 küm tashi nungbo shilem 22 dang kümogo.

Iba denji medemdangra Pakistan nung tang nütsüng shilem 45 jungnüa sensak tia nung lir aser nütsüng shilem 16.5 kanga sensak tia nung lir.

World Bank indang report ajanga ashiba agi, Pakistan nung nütsüng shilem 42.4 bo sensak tia nung liasü aser 2024-25 küm ano sensak tia air nütsüng million 1.9 bendenlokogo.

Tang Pakistan nung rongsenkettzüng ainba shilemji 2.6 dang lir, aser iba jagibo sensak tia nungi nüburtem

anitetsü atema asaktsü.

Iba dak alia Pakistan nung aluyimba sector tsütsü tebilemtsü onük aika ajurur, talisa tzünglu shilem 40 ajema arur, mesen-shirurui alu nung aonsotsü chitsür aser alu nungi züsentetba kanga ajema akümer.

Sensak tia ajema kümdaktsüba tsütsü India-i takok anguba aser Pakistan-i takok mangubaji ajanga 'global aid' timi amshir asü mamshirar meteter.

Tamalen India-i, alima linüktemi teyari agütsübaaji India anema kiralongratsü atema Pakistan-i amshir, ta Pakistan nem tai tonglokja liasü. Tang Pakistan nung sensak tia majemtsütetba report ya ajanga Pakistan nem agütsüba senotsü timi amshir asü mamshir mita reprangtsü nüngdak ta reprangteter.

Iba dak alia Pakistan-i rongsenkettzüng aser aluyimba dak sendakba tebilemtsü onük balala atema inyaktsüa akümtsü.



June 09, 2025 nü Jammu & Kashmir kübok Sunderbani sector nung aliba International Border aser Line of Control (LoC) nung BSF sepaitemi Village Defence Guards nem training agütsüba noksa nung angur.

## Kerala tzüyimkümlen Singapore nunger rong ka nung mi adok



Kerala tzüyimkümlen nungi nautical mile 130 shi pilar Singapore nunger rong MV WAN HAI 1503 nung langka apokba sülen arongdang tangokba noksa nung angur. Iba osang jangjaba sülen Indian Coast Guard-i yaritepa liasü.

### New Delhi, June 09

(Agencies): Kerala nung Kozhikode district kübok Beyore tzüyimkümlen nungi nautical mile 78 (kilometer 144) pilar Singapore nunger container rong, MV Wan Hai 503 nung langka kar apokba sülen mi adoka liasü.

Iba osang angashiba sülen Indian Navy aser Indian Coast Guard-i kümzüka maparen tenzüka liasü, ta Hombarnü

Defence Ministry nung otongdar kati X ajanga metetdaksü.

Rong nungji langka kar aiben apokba sülen rong nung aliba container 40 shi Arabian Sea tzüyim telungi ai. Iba lendong nungjagi kümzüksü atema rong nung alirtem aikati tzüyim nung pongokja liasü.

Kerala Disaster Management Authority Secretary, Shekhar Kuriakose-

i, "Rong nungji nisung 22 liasü aser parnok 18-ibo tzüyim nung pungoktsü, ajisüaka tangbo parnok kümzüka rongtem nung lir. Tanüngba nisungtemji tang tebushidak lir," ta metetdaksü.

Rong nung mi adokba osang jangjaba sülen Navy-i INS Surat rong oa yariteptsü tuyua liasü. Indian Coast Guard-ia CG Dornier tayimtsü amshia kümzüka maparen inyak.

## Tanü India nunger astronaut Shubhanshu Shukla ISS-i atutsü

### New Delhi, June 09

(Agencies): Mongolbarnü India nunger astronaut, Shubhanshu Shukla den nisung asem SpaceX indang Falcon-9 rocket nung mener International Space Station (ISS)-i atutsü; rocket ji Florida nung aliba Kennedy Space Centre (KSC) nungi apusotsü.

Küm 41 tejaklen (1984 küm) India nunger Rakesh Sharma-i mezüng Soviet Russia nunger Soyuz spacecraft nung space-i tua puti otsü tasen ka yanglua liasü; iba sülenbo tang ang India nungeri space-i atur asütsü.

Lucknow yimti nung asosang Shukla ya ISRO-NASA-i nungiter.

Axiom-4 (Ax-4) mission ya Florida nung aliba Kennedy Space Centre (KSC) nung Launch Complex 39A nungi apusotsü. Pilot Shukla den külemi ISS-i aturtemji

America tsür Commander Peggy Whitson aser specialist ana- Hungary nunger Tigor Kapu aser Poland nunger Slawosz Uznanski-Wisniewski nunger lir.

"Rocket ji anepdang 8:22 ako (India nunger mapangbo nikongdang 5:52) nung apusotsü," ta Falcon-9 rocket aser Dragon space capsule yanglur SpaceX-i metetdaksü.

Science & Technology Minister Jitendra Singh-i, "India nunger space tashi alimai züngshiba atema nüma atanger. Iba ya mezüngpur- Vikram Sarabhai aser Satish Dhawan nunger nem tetushi agütsüba lir," ta metetdaksü.

Anogo 14 tashi ISS nung amongba mapang nung ISS nungi parnoki Ato kilonser Narendra Modi, school tanurtem aser space industry nung lenirtem den jembitsü.



## TIR YIMYIM YIMOBILEM (EDITORIAL)

DIMAPUR TUESDAY, MAY (AAMI) 10, 2025

### Mozü agi amakba rara

**T**anü putu nung alima kin o kin na raraba yimya kenyongi tetsübutsäka balaka melenshiogo. Aji oda, tanübo alima tulu tila, nütsüng aika ali mali ta masü saka shirnok kolok agi nisung mali ser tayimtsü nung bomb sünga oshia bener oa pokloktsüteter aser shirnok koloki mile-sa mile orr aliba tesem ka bomb ama injang ka agi khaloktsü nung, kiojen ajak poksatsüteter aser shirnok kolok agi yangluba tereprangtsü oset agi tsükchir lima nung oa aliba dena reprangteta khasetteter, item limatem jagi dang rara akoker aser alima kintemi item kintemji tsübur. Ibayongji, tanü Israel o Hamas na aser Russia o Ukraine na raraba tongpang nunga akhidang ama tsükchir o tsükchir na tejak chitepa rarar masü saka nisung mali ser bomb amena bener odaktsüba tayimtsü 'drone' amshia rarar aser mile aika pilar talangka nung oa aliba tesemtemjia maktettsüsa prangpong tulu yanglua lir, anungji item jagi lia nungi amakba sülen dang sepaitembo tong aoer. Aji oda, item raraba tayimtsü aser prangpong tulu amshia tsükchir yimitem auyi kümtsüba asenoki anogo shia angur. Ajisüaka, item dang nungi tesashiba aser tetsübutsä taketba raraba yimya ka lir, aji mozü amshia raratsü, iba dangji Biological weapons ta ajar. Iba raraba hadirjibo bomb-a masü aser injang-a masü saka mozü agi tango kümdaktsür mopong nung dang proktsü. Aji oda, miim mozü ka yanglur ibaji tango kümdaktsür tsükchir lima nung iba tangoji chiok nungbo, ashiko, iba lima nung talir temang remdaka asütsüsa alima kin karibo yangluteta akatsüa akok. Iba ama ataloktsü tsübuba agi 1975 küm nungi alima kin shingaia 'biological weapons' meyanglutsü aser mamshitsü tenangzüktepba agi aser iba tenangzüktepba ken o nung alima kin 180 tashi agi mulunga meyongnem agüja lir. Ajisüaka, ano tetsübutsä kaji, alima kintemibo nangzüktepba amaji miim mozü agi tsükchir anema raratsü asoshibo meinyaki alitsüa akok saka alima nung kiralongrar telok karibo iba ama miim mozü mopong nung yoka raratsü asoshi yanglua amshia alitsü akok. Aji oda, asenoki angatetsüba kaji, küm asem pezüka jakdang asen lima tashi tonga aruba Covid 19 tashidak toa China lima nung yanglur prokshiba tashidak tapu ka liasü ta kanga jembiogo. Aji oda, Covid dang masü saka ajungbena tango mesashiteti akümba tashidak aser Africa lima nung tamalen poktetba Ebola tashidak ama ya tzü mopong nungi pasasa poktetba tashidak masü saka nisungi yangluba tashidaktem lir. Iba ama injang prangpong masü saka miim mozü yanglua alima nung kiralongraba mapa inyakba 'bioterrorism' nungi alima kintem kümzüka alitsü ajungshitepba mapang, tang US yimti Michigan nung China nung nung nung anati China teyari agia US nung raraba miim mozü yangluba putetba jagi alima kintem ya tapi agi alitsüla masü saka ajungben lendong tulu arununga koktettsüsa renema atatsübaji kanga tongtibang lir. Iba miim mozü jagibo alu nung tsünusenpongtsü aser chiyongtsü ajak raksatsür, anungji alutemji tapong akümtsü aser tsükchir lima nungji chiyongtsü maka ayawara arudaktsütsü aser idangji timtem marem tsükchir nem pei lima amoksepdaktsütsü. Aji oda, alima nung ya tsükchir lima akoktsü asoshi tsükchir sentong aika lir. Item ama meimlaba tesama lendong tulu nungi nübortem kümzüksü asoshi pei lima aser nübortem meimba aser alima nung kechisarina atalokba indang wainshin metetba yimten lenir aser government nungdaker. Miim tango agi kangshir asüyonga yimra manga dang atong nungbo peisasa yaritettsü saka Covid aser Ebola tashidak ama yimkong khen nung timatemtsüsa atalokra, ibajibo kija aser kibongibo anepalu mesütettsü, anungji government renema alitsüla, Kasaji, tangar tsükchir kini mopong nung miim yoka alu raksatsü nungbo, koda asütsü ta shisabolua inyakba government ka nungdaker. Iba ama tanü putu tensa raraba yimya memetet züzüa lira, chubai anir talir temang kenü nung remdaktsü. Ibaji meteta, talisa, lanurtem tashitemetet nung indaktsütsü merangtsüla aser senso shia dak iba ama tetsübutsä miim mozü amshia raraba anema nokdaktettsüsa tangazükba aser tangatetba alitsüla. Iba jagi asenok tashidak nungi dang masü saka tetsübu nungia asensasa aseni asen anitettsü.

## OLEMSABANG

### Yimsüsür dak nüburi tamang kaatettsüsa yimsü asütsüla

~ L. Kika Pongener

Tanü asen Naga lima nung nüburtemi akhidang kodanga meinyakba mapa tasen ka inyakba angur, aser ibaji nüburtemi sorkar anema lungkak aitba ya asütsü. Taküm küm ita ana-asem tsüngda nung danga atong-atonga pezüben tashi nüburtemi sorkar anema lungkak aitba ayongzüka denjia aruogo. Mezüngbuba Ao Kaketshir Mungdang (AKM)-i Imkongliba Memorial District Hospital Mokokchung nung Staffs peria maliba atema lungkak aitba ayongzükogo. Tanabuba Higher and Technical Education Department nung Professors aser Librarians 147 NPSC tatidang majangi Regularised sutsüba atema Naga Students Federation (NSF)-i anir Combine Technical Association of Nagaland (CTAN) aser Nagaland NET Qualified Forum (NNQF)-i lungkak aitba ayongzükogo. Tasembuba Confederation of Nagaland Chamber of Commerce and Industry (CNCCI)-i Municipal & Town Council inyakyim nung parnok temulong masüba atema takhangba aguja lungkak aitba ayongzükogo. Iba sulen pezübenbuba Ao, Angami, Sumi, Lotha, Rengma, item kin pongu-i 'Reservation Policy' meyipa reprangshitsü atema takhangba aguja lungkak aitba ayongzükogo. Küm ana-asem shi tejaklen asen Naga lima nung Urban Local Body (ULB) Election magitsü atema nüburtemi sorkar dang takhangba aguja kanga sashia lungkak aitba denjia aruogo.

Ano Ao Kaketshir Mungdang (AKM)-i Imkongliba Memorial District Hospital Mokokchung nung Block-A ki tasen yangluba agi temulong masüba sorkar anema ola adokba-a osangkaket nung nguogo. Ano Ao Kaketshir Mungdang (AKM)-isa Mokokchung District nung School metsür-ka (21) semdanga aodang reprangtetba....School teimba ka nung tesayur peria maliba aser tesayur transfer yoker temelen meyokba, School kar nungpo Classroom agi meperiba, Govt. Primary School ka nungpo Classroom terok tashi nung tesayur ana dang aliba, Govt High School ka nung Maths teacher & Hindi teacher maliba, Govt. Middle School ka nung English teacher maliba, Govt. Primary School ka nung teacher asem dang aliba....Iba indang osangkaket nung tejangja adoktsüba nguogo. Surabangla, Mokokchung District nung dang masü danga tanüngba District-tem School-tem nunga iba amajisa alitsü amai nüburtemi tamang makateti bilemer. Küm shia HSLC Exam. nung sorkar school result majungba ya iba amai senzuka toktsüba yagi majunger sudi ta bilemer. Ano Hindi teacher-tem nem itasen (Salary) ita asem tashi magutsüba atema All Nagaland Hindi teacher's Union (ANHTU)-i sorkar anema ola adokba osangkaket nung nguogo. Ano Indian Administrative Service (IAS) Cadre nung shimba (Induction) inyakyim nung tim mesui inyakba atema Confederation of All Nagaland State Service Employee's Association (CANSSEA), Federation of Nagaland State Engineering Service Association (FONSESA), Nagaland Secretariat Service Association (NSSA), Nagaland Finance & Accounts Service Association (NF&ASA), item telok ajaki tawa sorkar anema ola adokba osangkaket nung nguogo. Aji oda, sorkar inyakyim agi nübur mulong masüba kinuk ajaklen nungi ola adokba ya 'opposition' maliba sungjang asütsü ta nüburtemi asadangteter.

**(Maneni asüng adok nung...)**

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

# Dimapur nung 35buba YMCA-NEIR Regional Council senden amen



**Dimapur, Aami/June 09 (TYO):** June 6-7, 2025 anogotem nung Livingstone Foundation International, Dimapur nung 35buba Young Men's Christian Association (YMCA), North East India Region Regional Council senden menogo.

Iba sentong ya 'Breaking Barriers & Striving Towards Common Achievements' omen nung ajemdaker agi aser tetushi tejaokerji Movement Strengthening, National Council of YMCAs of India (NCYI) Secretary, Shaji James liasü, ta Media & Information Team, YMCA Dimapur, Nagaland sangdong ajanga metetdaksü.

Iba sentong ya YMCA Nagaland-i ayongzüka Tir Dr. Andrew Ahoto Sema leniba nung agi. Pa ya North East India Regional Committee of YMCA nunga Regional Chairman lir.

Aizawl, Shillong, Dimapur, Nongtalang, Shangpung, Jowai City nungi YMCA ketdangsertem aser tawa tentetba Gangtok YMCAnungia züngsemtem aden.

Iba sentong nung shisalen sayurtemji taoba mapang Properties & Projects, NCYI

secretary Udipta Fullonton aser North East Institute of Social Sciences & Research nung Principal, Dr. Fr. C.P. Anto na liasü.

Regional Meet tetenzük sentong nung okila jembidang tetushi tejaoker Shaji James-i regional-i amalitepa inyakba, lanurtem nem shilem agidaktsüba aser loktiliba-sobaliba tsütsü tetsüdaktsü ajak kochteta inyakba metetdaksü.

Paisa, June 6 anogo ya YMCA 181buba Foundation Day lir aser iba anogomong nung YMCA-i Khristan lenisüba aser mission wadang ajanga nüburtem tenzükba atema benjunger, ta ashi.

Lokti pelaa agizükba o jembidang Dr. Andrew Ahoto Sema-i YMCA unit ajak ka küma longjema alitsüji kanga tongtiband, talisa North Eastern region nung sobaliba aser maitsü balala liaka longjema alitsüji tongtiband, ta ashi.

Paisa northeast region nung terenlok, talisa lanurtem atema inyaktsü asoshi Khristantem longjemtsü asoshi YMCA ya sabang tetemsü ka südaktsüsüla, ta ashi.


Sentong tetenzüklen YMCA Nagaland nung Woman

Member Zhimoholi S. Zhimomi-i sarasadem aser Dimapur YMCA nungi lanurtemi ken ka aten.

Taoba mapang YMCA-NEIR nung Chairman Dr. R. Lalthangliana-i salem osang lemsatepa liasü aser YMCA Nagaland General Secretary, Sanjeev Momin-i tepela anküp o jembiba sülen YMCA Member Atuonuo-i sarasadema sentong tembanga liasü.

Regional meet nung adener tongtiband lenirtem rongnung Dr. R. Lalthangliana, taoba mapang Regional Chairman, YMCA-NEIR & President, Aizawl YMCA, Er. K. Lalsawmvela, Secretary, Aizawl YMCA & Committee Member, NEIR, Sandy B. Tariat, Vice Chairman, YMCA NEIR, Shamir J. Thabah, Regional Secretary, YMCA NEIR, Rev. G.S. Shullai, Regional Treasurer, NEIR, Joe RZ Thanga, Secretary, Aizawl YMCA, & Committee Member, YMCA NEIR, A.L. Pariat, taoba mapang Regional Treasurer, NEIR aser H.F. Rymbui, Regional Committee Member, NEIR nunger densema liasü.

## Tejen Lai nung mongin, Walter Brueggemann alima nungi pilaogo



**June 08, 2025:** Tanü putu nung Laishir mongin, talisa Tejen Lai nung mongin, Walter Brueggemann alima nungi pilaogo; pa arrshi küm 92 liasü.

June 5 nü pa par kidang lia süngjema amozüka ao.

Tesüiba küm 60 tsüngda Brueggemann-i kaket 100 dak tali zülüogo aser ocet balala zülüba ajanga Arogo lenirtem aika temoatsü nguogo.

Pai zülüba kakettem ajanga pastor tem aika onük renemba nung yari, talisa 1978 küm sayaba kaket 'The Prophetic Imagination' ajanga aika temoatsü angu. Iba kaket ya

copy million 1 dak tali ayak aser tanü tashi seminaries aika nung iba kaket nungi tesayuba agütsür.

Brueggemann ya Decatur, Georgia nung aliba Columbia Theological Seminary nung Old Testament professor emeritus liasü. 2003 küm tashi pa iba seminary nungji tesayur inyaka aruba sülen anisüngzü.

Kaketzülor, tesayur aser sayutsüngir, Brueggemann-i tanü putu den apet Tsüngrem ola angatsü ayongzüka liasü.

Tang Columbia Theological Seminary nung Old Testament professor teinyakdak, Dr

William P Brown-i, Walter-i sayuba aser pai zülüba kakettem ajanga laishirtem aser pastor tem aika melenshiogo, ta ashi.

Walter ya United Church of Christ nung ordain süa liasü, ajisüiaka pai kodanga pastor bo meinyakdang. Pa ya sayutsüngir aser tesayur tajung ka liasü. Pai sayutsüngiba onüktemji Lai otem nung ajemdaker liasü aser loktiliba, yimtenren aser rongsenketzüng den sendaktepa pai sayutsüngi.

Pa ya 1933 küm Tilden, Nebraska nung aso aser Blackburn, Missouri nung inteta liasü. Blackburn nungji tebu German Evangelical Synod of North America nung pastor inyaka liasü.

Pai Elmhurst College, Eden Theological Seminary aser Union Theological Seminary nungi degrees angu aser St Louis University nung PhD renem.

Brueggemann-i pa kinüngtsü, Tia den par jabaso ana- James aser John toktsür pilaogo.

## ANOGO ABEN TSÜNGREM DEN

### Tasak saka takoktsü

*"Temeshi pur asütsü ajaba"- Rom 1:7.*

Temeshi pur asütsü ajaba nung asenoki tematiba sentsüwangshi dang angur masü, saka tasaktibaa angur. Asenoki shidakba tajung akümtsü memerang tashi asenok kodaka majung aji memetettsü. Asenoki shidakba tenla agütsütsü mangatet tashi asenok koda ka merumeru asenoki mangatettsü. Asenok tajung inyaktsü memerang tashi asenok majungbatem mangatettsü. Asenoki temeshi alitsü memerang tashi asenok temenen nisung ta mangatettsü. Aji saka: "Temeshi pur asütsü" ajabaji lir.

Sermon agütsütsü temela, zülutsü temela, ken mejemtsü a temela, telok anishitsü temela, yimsü mapa nung tongtipang shilem agitsüa temela, mapa agi sayua temeshi pur asütsü tasaktiba lir.

Khristan yimsüi tama mapa masü, jakla repranger. Asenok "temeshi pur" asütsü aja. Aji asenoki langka "meinyakdang" "langka" asütsü ajaba. Iba nung teti sotta alitsüa menüngdak. Asenok jakla agi masü, Khrista jakla agi asenok kümzü. Temeshiba akümtsüba mapa nungji Khrista jaklaji kü jakla akümtsüla aser Tsüngrem tsüngdang obendangba tsütsü nung ni Khrista nung tenokdakdak tasen ka nung noktaker. Saka kodang ni temenen maketba jakla aser Kümtetdakba Khristai kümzüker ni jakla yanglushir. Kü shilem bendanga agütsüba, aser Pa mapa ajanga kü jakla Pa jakla ama akümer. Asenok mapa agi mekümzü, saka Tsüngrem shilem pa taochi, aser asenok shilem tamang ajanga kümzü; aji saka mapa tajung meteni asenok kümzüksü makok, kechi aser Yakob 2:17 nung Yakobi ashir, "Tamang meteni mapaji tasü"- tamang tasüji tamang masü.

Kilitsür kati ashi, "Ni temulung memeyipdang atem nung alemba sü tema dang aok, ni temulung meyiper iba telunglenjia aoker." Pastor kati asangur sepoy ka dang asüngdang, "Ner kibong nung Khristan akümer shinga mali asü?" Sepoy jagi langzü, "Au, kübu lir." "Nübu Khrista dangi temulung meyipba jagi kibong nung tepila lir asü?" "Au" ta sepoy jagi langzü, "iba jagi kibong nung onok ajak timtemdaktsür." Tebui shidakba temeshi pur noksaji mesayuba sayur. Terunemji teshinem mekümdaktsüi iba jagi ki süngdaktsüsüla. Temeshi pur asütsü asoshi telemtetba takang, saka temeim aser mapa nung tajinütsü keta inyaktsüla.

Asenok temeshi pur akümtsü takoktsü kümdaktsüba asoshi Tsüngrem tenüng sangdi. Tsüngremi ayonzükba ajakji tenangzükbatem lir. Pa ozüngtem ajak takoktsü lir. Ni yamaji asütsü ta mulungtetra, yamaji alitsü. Aser Pa kü mulung nung aliba ajanga Kibubai aji oda inyaktsü. Temeshi taküm ka alitsü temerang; temeshi minute ka alitsü merangang ! Item rokerji temeshi ghonda ka yanglusang, aser ghondatemi anogotem, hoptatem, kümtem yanglur. Minuteji ne meyong. Aji Pa asoshi liang, bilemdang, jangraang, jembidang. Ibaji takoktsü. Khrista ne dak lir. Pa nem agüjang. Pa amangang, Pa tendangang.

## America nung kenüyongi nisung 26,000 dak tali baptiogo

**June 09, 2025:** Pentecost Sunday (June 08, 2025) nü America tesem balala nung nisung meyrjang aikati yimjak nung Khrista agizükba sangdonga baptiogo, aser iba ya America nunger puti otsü nung anogo ka kija nung nisung teimtiba baptiba lir.

Baptize America dak sendakba sentong nung state 50 nung aliba Arogo 650 dak temai shilem agia nisung 26,000 dak tali baptitsüogo.

Baptize America sentong ayongzükertem rongnung ka, pastor Mark Francey-i, "Yohan kaket nung Yisui asenok ka akümtsü ta sarasadem, aser tang ibaji asenoki angur ta ni bilemer. Asenok ajaki melungtepa longjemer tzu nung baptir," ta ashi.

Küm ana tejaklen mezüng Baptize California agiba mapang nung nisung 4,000 baptia liasü aser yaküm kasa sentong nung nisung 6,000 dak

tali bapti aser takümbo iba sentong nung nisung 26,000 dak tali baptiogo.

Taküm iba tongti sentongji Pirate's Cove tzüyimküm nung agi. 1970s nung Jesus Movement mapang kasa tesem nung Pastor Chuck Smith-i nisung aika baptija liasü.

Pentecost Sunday nü baptirtem rongnung ka, Kaili Newby-i, "Yangji Tsüngrem-a ali ama liasü; tesüngmangtsüka liasü," ta ashi.

Ano nisung ka tenüng agi, Gabriel-i, "Kütsü sarasadem aser Tsüngrem taochi ajanga ni kümzü, mesüra ni süadoker lila mesüra jail nung lila," ta ashi.

Ano nisung ka tenüng agi Jorge Gonzalez-i, "Tsüngremi kü melungjang nung jembia liasü. Ibayongji ni yagi aru aser Yisüji kü Kümtetdakba ta ni agizük. Iba atema tanü anogo ya maongka tajungtiba liasü," ta ashi.

**AO OSHI ANGAZÜKDAK:****TANÜ ANGAZÜKTSÜBA OJANG****Tentsürang**

(n) anü kanga sashia pulokdak, ali takong (sunny place, dried land)

\* Tentsürang nung züsentetba aonsutsü tanang asür.

**Tenu**

(n) adianu rongnung tanubo/tanutsü (younger siblings)

\* Lanuba tenu nunger aika lir.



Tir Yimyim

**OLONG PAITEP # 7177**

|    |   |    |    |    |   |   |   |    |  |    |
|----|---|----|----|----|---|---|---|----|--|----|
|    | 1 |    | 2  |    |   | 3 |   | 4  |  | 5  |
|    |   |    |    |    |   |   |   |    |  |    |
| 6  |   |    |    |    |   |   |   | 7  |  |    |
|    |   |    |    |    |   |   |   |    |  |    |
|    |   |    |    |    | 8 |   | 9 |    |  |    |
|    |   |    | 10 |    |   |   |   |    |  |    |
| 11 |   |    |    |    |   |   |   |    |  |    |
|    |   |    |    | 12 |   |   |   |    |  |    |
| 13 |   | 14 |    | 15 |   |   |   |    |  | 16 |
|    |   |    |    |    |   |   |   |    |  |    |
| 17 |   |    |    |    |   |   |   | 18 |  |    |

**TIPIEN**

1. Inyaker ajangtetba - (3)
3. Bangsemo adokdak - (5)
6. Shitak mesüi inyak - (7)
7. Ya mimong nung angur - (3)
9. Reprangzük - (4)
10. Tasola - (5)
11. S \_\_\_\_\_ - (4)
13. Yagi ajak ashioktsür - (3)
15. Ki aokba oset - (7)
17. Ak shi nung inokba tasen - (5)
18. Ishika - (3)

**LANGTSÜNGLEN**

1. Meshidak - (3)
2. Tanaben soshir - (7)
3. Iba anogo - (4)
4. Meshi - (3)
5. Yagi mi tsükloker - (9)
6. Shi tapu ka - (9)
8. Yagi ayimer saka ozü masü - (3)
9. Ajokba shiruru ka - (7)
12. Inyaktet - (4)
14. \_\_\_\_ hi - (3)
16. Akümüli nungi pilar - (3)

**OLONG PAITEP # 7175 TELANGZÜBA****TIPIEN :**

1. Telok, 4. Aluru, 6. Ozüing, 8. Emk,
9. Kin, 10. Teti, 12. Süir, 13. Jen,
14. Ola, 16. Talak, 17. Mazük.

**LANGTSÜNGLEN :**

1. Tenükjang, 2. Luden, 3. Kioiktsü,
5. Lenti, 7. Tajangzük,
11. teronem, 12. Sempa,
13. Jahaz.


**ALOKBAI TENLA SEN MESHITETA**  
**SARASADEMER :**

**Alokba :** Temoatsür Kibuba, onok Ali meimchir temenen lima nung alir, anungji onoki alirongsen ochi mashi agi bendena auyaba rongsen, rakzükraktemba rongsen, Alima terenlok asoshi aruba rongsen mejezbzüka bendener ne dangi bener arura nai meshitettsütsü akok ta tamang teyimla tulu nung ne dangi bener arua lir, anungji ( idangji teka talangka sen juli nungji amuok) ya shiba teka talang juli nung amushir? Tang aienshiang !!!!!

**Auer :** Memerekba rongsen ya kechi sütsü, Tsüngremi memeshitetdangyongi kü yangku süngdi taaaaaaa!!!

**Alokba :** Ya Shir kin teka ????????

**Lilir : I. Kilang, Ajem, Indisen, Dimapur.**

**Indian Army-i Arunachal nung drones amshia yariteper**

**Dibrugarh, June 9, 2025**

**(Agencies):** Indian Army-i Arunachal Pradesh nung tang mezüing atema tzümetsüing agi kongshia alidak drones amshiogo.

Dibang Valley region nung relief aser rescue maparen nung drones amshi.

Tzünglu kanga aruba ajanga Dibang Valley nung tesem aika nung anentsüh alua lir. Indian Army-i Mawali Village nung alir

nem supplies agütsütsü atema special relief mission ka inyaka liasü.

Tzümetsüing aser anentsüh ajanga ki, infrastructure aser alutem raksatsüogo.

Teraksa tuluba angubaji Athunli village nung lir aser idakji ki 16 tzü agi ponger ao.

Iba anasa aliba Mawali village nunga lenmang aser apu ajak anenbanga lir.

Indian Army team-i Mawali

nung alirtem nem rations, medicines aser tanga supplies agütsütsü atema drones amshi. Iba ajanga District Disaster Management Authority (DDMA) rescue team tesem tonga maodang yimdaklirtemi teyari tulu ngua liasü.

Army-isa rope line ajanga ayong temdanga ropeway ka yangluogo aser iba ajanga essential supplies belener aser nisungtem aniteter.

**Congress-i BTC menden 40 prong nung tokteptsü**

**Guwahati, June 9, 2025**

**(Agencies):** Taküm September ita agitsü aliba Bodoland Territorial Council (BTC) elections nung Assam Congress-i menden 40 prong nung tokteptsü.

Iba osang ya All India Congress Committee (AICC) Secretary aser Assam In-charge Prithviraj Sathe-i metetdaksü.

"Congress-i BTC elections nung shinga teyari magii tokteptsü renema lir. Bodoland Territorial

Region (BTR) nung alirtemi temelenshi aginür aser onoki ibaji agütsütsü" ta Sathe-i ashi.

Congress-i BTR nung telok akangshitsü aser tashi aittsü atema kanga meranga inyakdar ta paisa ashi.

United People's Party Liberal (UPPL)-i BJP den yaritepa akümba BTC sorkari dak public-i temulung masür ta paisa ashi.

Kokrajhar nung agiba training program ya digital

outreach nung ajemdaker agi aser BTC constituency 40 nungi teshimtet nübotem aden.

Iba mapa ya party züngsemtem social media aser information technology tali shia meteta alitsü atema inyakba lir.

Iba sentong nung APCC Working President MLA Zakir Hussain Sikdar, MLA Rashlin Turkey, Pradip Sarkar, Santanu Roy, aser AICC in-charge of social media for Assam Ratul Kalita nunger aden.

**Social activist temi Assam sorkar anema lungkak aiter**

**Guwahati, June 9, 2025**

**(Agencies):** Guwahati nung civil society activist temi Assam sorkar anema tekong meranga noktaker.

Assam sorkari public tebilemba magizker, lipoküm atema mebilemer aser GNB Road flyover project atema taoba nung nangzükba agienogo ta activist temi ashir.

Ambari aser Dighalipukhuri tesemtem nung küm noklang ka tema tain süngdongtem tsüngdokba aser belenba aitsür ta Guwahati nung osangbener senden ka nung activist temi ashi.

Iba mapatong atema tesüiba nung public-i lungkak aitba aser okadak ken o benokba sülen sorkari tenangzükba agia liasü.

Idangji parnoki süngdong kecha dak mekongshii flyover design

yanglushitsü ta nangzük aser iba ajanga Guwahati nung alir aika temulung anisüngzüka liasü ta activist temi ashi.

"Ita 6 shi lir külen sorkari nangzükba ama masü saka khenyongi balaka inyaker. Ketdangsurtemi küm noklang ka jungnüa süngdongtem tsüngdoker" ta activist temi ashi.

Yaküm November ita Assam sorkari Gauhati High Court nung affidavit ka agütsüba lungkak aiter temi nenshir.

Dighalipukhuri nung lungkak aitba mapang aser Public Interest Litigation (PIL) ka benokba sülen Assam sorkari süngdong ka dak danga mekongshii flyover design yanglushitsü nangzüka liasü.

Ajisüaka sorkari tangbo süngdong aika tsüngdokogo aser

Ambari o Dighalipukhuri nungi süngdong 77 belentsü ta high court dang ashir. Iba ya tesüiba nung nangzükba den meputep aser okadak mezüingmeshiba inyakyim ka lir ta activist temisa metetdaksüogo.

Honibar aonung kaketshirtem aser sensotem dak tashiyim inyak aser police-i apu. Iba ya democratic inyakyim anema lir.

Deobarnü Chandra Prabha Saikiani Bhawan nung osangbener senden amendang Scholar & Public Intellectual Dr. Hiren Gohain, Scientist & Science Writer Dr. Dinesh Chandra Goswami, Social Scientist Dr. Apurba Kr. Barua, Historian Dr. Manorama Sharma, aser Lawyer Shantanu Borthakur nunger liasü.

**GOVERNMENT OF NAGALAND**  
**DIRECTORATE OF HEALTH & FAMILY WELFARE**  
**NAGALAND: KOHIMA**

No. DHFW-5/TRG/PMTI/2023-24

Dated, Kohima the \_\_\_\_\_th June. 2025.

**ADVERTISEMENT**

In pursuance to Govt. approval No. HFW(A)-12/220/2024/01, Dated Kohima, the 6th June 2025, interested candidates from bonafide Indigenous Inhabitants for the State of Nagaland are invited for Lateral Entry to Bachelor of Science in Medical Laboratory Technology (3rd Semester) 2025 at Para Medical Training Institute Kohima affiliated to Nagaland University (N.U).

1. Candidate should be PU (10+2) Science passed (Physics, Chemistry & Biology).
2. Candidates should possess DMLT Certificate (Passed Certificate and Mark sheet) from recognized Central/State Government Institute.
3. Number of seats for Lateral Entry to BSc. MLT is 3 (three).
4. Selection of the candidates shall be based on Academic Merit Marks (DMLT).
5. Preference will be given to regular passed out candidates (DMLT) without any back paper(s).
6. Forms will be issued from the Office of the Principal PMTI Kohima.
7. Issue of application forms will be 16th to 19th June 2025.
8. Last date of submission of application form shall be on 21st June 2025.
9. Application along with DMLT Certificate duly self- attested should be submitted along with the ST/ SC and Indigenous Inhabitant Certificate, which is compulsory.
10. Incomplete application, if submitted, will be summarily rejected.


\*Any other related information may be obtained from the Office of The Principal PMTI, Kohima during Office hours. Phone: +91-3707960098

**SD/-DR. MERENINLA SENLEM**

Director & HOD

Directorate of Health & Family Welfare,  
Nagaland: Kohima.

Thailand, Cambodia nati arrtsü nungi sepaitem anintsü



Thai aser Cambodian Defense Minister tem arrtsü nung mangatettep aliba ken otem asoshi senden amenba mapang.

**Bangkok, Aami/June 9 (Agencies):** Thai aser Cambodia sepaitem taoba mapang mulungteper aliba tesemtemi meyipa aotsü, ta linük anapronglai sangdongogo. Mangatettep adoka Cambodia nunger sepai ka tepsetba sülen sorkar anapronglai arrtsü nung iba tesem yagi sepai talila yoka liasü.

Thai Defence Minister Phumtham Wechayachai-i Deobarnü ashiba agi, linük anapronglai Honibarnü Joint Boundary Committee senden amenba mapang arrtsü nung ken o ya bentettsü imla atadar. Iba committee ya bilateral sensaksem atema tentetba lir.

Ajisüaka Cambodia Foreign Minister Prak Sokhonn-i ashiba agi, par sorkari arrtsü nung mangatettep aliba ken o bentettsü atema International Court of Justice ayongzükogo. "Ken o benjaba, puti otsü

asere ken o kanga tedangshi majungba apir bilateral sensaksem kija agi dangbo teti atema ken o benteta meyutettsü," ta Sokhonn-i ashi. Ajisüaka Thailand-i ashiba agi, parnoki court inyakyim magizüker aser sensaksem ajanga dang ken o bentettsü benokogo.

Cambodia French colony ka aliba mapang 1907 kum France-i linük map yangluba mapang nungi tenzüka arrtsü junga mebentetti aliba tesemtem nung linük ana ya aso ka dak tema rara arudar.

2008 kum 11th-century Hindu temple ka mechi nung raratep tenzüka sülen mapangshia mangatettep adoka arudar aser iba mapang nisung 28 süogo.

May 28 nü mangatettep adokba sülen Cambodia kübok Preah Vihear province aser Thailand kübok Ubon

Ratchathani province ba tsüngda arrtsü nung mangatettep adoker aliba tesem nung Cambodia nunger sepai ka tepseta liasü.

Thai aser Cambodia military-i tensa süngjema kümdaktsütsü atema mulungtepogo, ajisüaka Cambodia-i ashiba agi, Thailand-i mepeshiaka parnoki iba tesem nungi sepaitem manintsü akok.

Honibarnü Thai army-i, Cambodia den arrtsü nung crossing lapokba shibangba ajak azüoka liasü aser ashiba agi, tensa ya Thailand sovereignty aser security atema amokmeren ka lir.

Linük ana tsüngda arrtsü km817 nung Thailand-i official border crossings 17 achaayangdar. Deobarnü army-i border crossing 10 nung mapa inyaksangshiba mapang ajemja liasü.

Sentong yanglur aliba ama Russia den tepuoker melenteptsü: Ukraine

**Kyiv, Aami/June 9 (Agencies):** Russia aser Ukraine na mulungteper aliba ama taruba hopta tepuokertem melenteptsü, ta Ukraine indang intelligence tekolakbai ashiba den, tepuokertem melenteptsü atema Kyiv-i mapang telatet ka makai atsülangtsüogo, ta Moscow-i ashiba aitsüogo.

"Istanbul nung sensaksemba mapang mulungtepba ama tepuokertem taruba hopya nungi melenteptsü, ta ken o dak sendakba nung tashi agüja aliba ketdangsrütem nem Mongolbarnü metetdaktsüogo," ta military intelligence tekolakba Kyrylo Budanov-i ashi.

"Tsükchirtemi osang tai agüjaka inyakyim ajak sentong yanglur aliba ama odar," ta paisha ashisem.

Russia-i Honibarnü sangdong ka ajanga, linük anaprongla nungi sepai tasü mang 6000 den yirur aliba

asere temang kanga mejungi aliba tepuokertem aser arishi kum 25 tekübok aliba tepuokertem melenteptsü atema Ukraine-i mapang telatet ka makai atsülangtsüogo ta shia Kyiv aija liasü.

Ukraine-i, Istanbul nung mulungtepba ama inyaka arudar, ta Budanov-i Honibarnü iba Turkey yimti nung tanabenbuba sensaksemba indang tetshia jembi.

Kasa mapang nung Russia-i ashiba agi, parnoki Ukraine nunger tasü mang 1000 dak tema arrtsü nung tasü mang melenteptsüba tesemi bener aruogo aser Ukraine nem tepuoker 640 bendanga agütsüogo, ajisüaka Ukraine nunger ketdangsürtem iba tesemi maru. Ukraine-i iba taitsuba ya magizük aser Moscow dang iba amala inyakyim nung pila alitsü shiogo.

Linük ana tsüngda khen atema ceasefire benoka atatsü

asoshi tangatettep ka dangi maruteti lir, koba rara anentsü atema tamendakdak asütsü. Kasa mapang nung yimjung atema teyongtsüi ia sensaksemtsüsang US tir Donald Trump-ia tenangzüktepba ka yanglutsü atema matateti kumogo, aser linük anaprongla kanga makoksa tashi tanurtem moapu nung raratepba ama raratepdakjang ta-a shidangogo.

Kasa mapang nung Trump-i, European Union aser United Kingdom nati Russia nem tenokdangba tesashi agütsüba amabo agüja mali.

Yimjung atema jembishinüa aruba mapang Russia-i Deobarnü ashiba agi, parnoki linük yimtiba Moscow amaktsü atema Ukraine-i yokba drone 10 khazüka yokogo. Kasa mapang nung Kyiv-ia, Russia-i yokba strategic bombers shilem 14bo nokdangogo, ta ashi.

Hamas tanishir Mohammed Sinwar temang jangjatetogo: Israel

**Jerusalem, Aami/June 09 (Agencies):** Israel mitkari Gaza nung Palestine nunger telungpur telok Hamas lenir Mohammed Sinwar temang nguteta jangjatetogo ta ashir.

Pa indang temang ya Khan Younis yimti nung aliba European Hospital kübok longpok ka nung ngutet, ta Israel Defense Forces (IDF) ajanga Deobarnü ashi.

Parnoki DNA tendangba ajanga temang ya jangjatet ta ashi - saka Hamas-ibo tang tashi pa asüba yimjak nung sangdonga mali.

Arishi kum 49 tain Sinwar ya May 13 nü tayimtsü amshia amakdang tepset, aser iba mapangya nisung 28 tepset aser aika yiru ta Hamas meyong civil defence agency ajanga shia liasü.

Sinwar temang ya Hamas indang Rafah Brigade commander Mohammad Sabaneh den külemi ngutet, ta IDF ajanga ashi.

"Iba tesem nung Sinwar aser Sabaneh meyong oset kar ngutet aser ani itdangiteri nüngdakba kar ngutet aser itemji bushisüngdangtsü atema agütsüogo," ta ashi.

IDF-isa dangar tasü mang tema ngutetogo aser jangjatsü meranger ta ashi.

Parnoki iba longpok sayutsü asoshi bendanger osangbener telok tilaka Khan Younis-i Deobarnü anir oa liasü.

Ano parnoki video ka prokshiba nung iba longpok telungi aiba kikum tilaka sayu, koba European Hospital jakdang ali tasen tua yitete.

Video nungya ali telung nung corridor talang aser temesü ka sayu, aser takdang balala nung tangtepa liasü.

Takdang kar nung aben süoshi aser plastic chairs liasü aser rifle ka jara nung metaloka liasü. Video ka nung nisung temang sü agi aleper longpok nungi lisü ka amshia atsüteta liasü.

IDF odongtar Brig Gen Effie Defrin-i ashiba agi, item takdang tem ronung ka nungi Sinwar temang ya ngutet.

"Ibai Hamas-i human shields ama civilian tem amshiba, civilian ki o jen, mozüki amala maneni amshiba tasa tamajung tatishitsü ka lir," ta pai ashi.

Hamas-i nok-nü miima ayutsü aser command centres ama amshitsü asoshi mozüki tem amshir ta Israel-i aiben tai tonglokja arur, saka parnoki aji magizüker.

IDF-i Gaza nung aliba mozüki tem sapanga aser maka arur, mesüra yutsür ainshitsü totuyuba agütsü, anungji iba territory indang health system telaor lir.

Yamaji amakba linük balalai

kanga khuret süa bilemstsür, kechiaser mozüki aser medical facilities aika melapokteter aser shiranger aser staff tem takum lendong nung yutsür.

Israel-i April ita al-Ahli mozüki amakba sülen UN Secretary General Antonio Guterres-i sangdong ka nung pa kangasa aoksadaktsür aser international humanitarian law kübok yirur aliba aser shiranger, medical personnel aser medical facilities tem akumtsüboa aser kumzüka amshitsü shia lir, ta shia liasü.

Gaza nung mozüki ketdangsür temia Hamas temi parnok indang facilities mamshir ta aiben shia arur.

IDF temi tang tesüsa tangokba video ya kuli ka ama amshitsü. Gaza nung yamaji atalok yonga iba video ya IDF-i ashiba ama shidakba asü masüar mejangjateter.

Hamas-i anir Gaza nungi telungpur telok balalai October 7, 2023 nü arütsü alema aita Israel nung nisung 1,200 shi tepseter ano nisung 251 pua bener aoba nung telangzüba agüja Israel-i iba alinük nung military campaign ya tenzüka liasü.

Iba sülen Gaza nung nisung 54,880 shi tepsetogo, ta iba territory nung Hamas meyong health ministry ajanga ashi.

Ita ishika tejakdang ceasefire aser pua alirtem melenteptsü tezüngzüktep yanglua aliba raksaba sülen Gaza nung asendenshir rara ya tenzüka lir.

Iba sülen Israel-i Hamas samatsütsü aser pua bener aortem tanaben bushiteta anir arutsü nükjidong akangshia inyaker. October 7, 2023 nü telungpuri pua bener aortem timba chioker nisung 54 dang anünga lir aser item rongnung parnok 23 takum lir ta amanger.

Hamas ya 1980s tatemlen tenteter mapang tatsüka lir Mohammed Sinwar ya iba telok nung aden aser iba telok indang military wing Izzedine al-Qassam Brigades nung züngsem akum.

Iba sülen pa temaba jenjangi ajungketa 2005 tashinung pa Khan Younis Brigade indang commander kumer liasü.

Sinwar ya ano taoba mapang Hamas indang mitkar tanishir Mohammed Deif den tesendaktep tajung liasü ta ashir aser October 7 nü amaktsü tasa yangluba nunga dena liasü.

Pa adianu aser pa melenzüksang Yahya Sinwar ya October 7 azüdokshiba tasa yanglur tetsüti rongnung ka südi ta amanger aser pa Israel sepaitemi taoba kum October ita tepset.

## Portugal-i UEFA Nations League kokogo



**Aami/June 9, 2025**

**(Agencies):** UEFA Nations League final nung Spain den asaya goal 2-2 nung tembangba sülen penalty asayaba mapang goal 5-3 agi takok ngua Portugal-i iba asayamung tanabenbuba kokogo.

Iba asaya nung Cristiano Ronaldo-i par team atema kanga dang tongtibang tanabuba goal idaktsü, saka pa yiruba ajanga asaya tom nung tugatoksüsa aküm. Portugal-i iba asayamung anabenbuba koka otsü tasen ka yangluogo.

Asaya nung team anapronglai goal idaktsütsü atema attack süa asaya. Asaya tenzüker mapang tatsüka tsüngda Portugal atema João Neves-i goal ka tera agi dang midaktsü aser Spain atema Pedri aser Nico Williams natia goal idaktsütsü atema maongka

yangluteta asaya.

Iba sülen Spain nungi asayar Martin Zubimendi-i minute 21buba nung goal ka idakja parnok tejakdang aküm. Ajisüaka minute pongu dang lir Portugal atema Nuno Mendes-i goal ka idakja team ana tsüngda goal kasasa aküm.

Asaya mezüngbuba shilem tembangtsü lia Pedri-i agütsüba ball ka Mikel Oyarzabal-i kanga junga idakja Spain maneni goal 2-1 agi tejakdang aküm.

Asaya tanabuba shilem nung Rúben Neves aser Nelson Semedo na aitba sülen Portugal team tajunbag asaya tenzüker. Iba sülen asaya tenzüker ghonda ka süia asayaba mapang Mendes-i agütsüba goal ka Ronaldo-i idakja goal kasasa aküm. Iba goal ya Ronaldo asoshi pa indang career nung goal

938buba liasü.

Ronaldo yirur tugatokaka Portugal-i mapang apuloktsü asayaba mapang maneni Spain nongshia asaya. Semedo-i maongka tajung ka magitet aser Rafael Leao-i kanga kara asayaba ya Spain defence atema timtem liasü. Diogo Jota-ia asaya tatemi goal idaktsütsü maongka tajung ka anguba magitet.

Penalty metsütepba mapang team anapronglai mezüngbuba shot asemsembo idaktsü. Iba sülen Álvaro Morata-i metsüba ball Portuguese goalkeeper Diogo Costa-i nokdanga liasü.

Portugal atema asaya akoktsü asoshi tatembangbuba penalty ya Ruben Neves-i metsü aser pai aibelen mesüi idakja parnoki iba asayamung koka liasü.

## Chelsea-i Strasbourg defender Sarr alizükogo

**Aami/June 9, 2025**

**(Agencies):** Chelsea-i partner club Strasbourg nungi defender Mamadou Sarr pound million 12 agi alizükogo.

Arishi küm 19 tain France nunger asayar yagi küm ti atema tenanzüktepba ka yangluogo aser pa iba ita US nung asayatsü aliba Club World Cup nung asayatsü asoshi temsüa lir.

Enzo Maresca-i aniba team ya iba asayamung nung June 16 nü LAFC den mezüngbuba asayatsü aser iba sülen June 20 nü Brazil club Flamengo den asayatsü aser group stage nung tatembangbuba asaya Tunisian

champions ES Tunis den June 25 nü asayatsü.

Chelsea aser Strasbourg nati Sarr atema January ita tenanzüktepba ka yanglu. Pa lemluwa transfer asütsü atema nanzükteper liasü.

Pa iba season Strasbourg nungi asayamung ajak nung asaya 28 nung asayaogo. Parnok Ligue 1 nung jenjang tentbuba nung tembang aser Conference League play-offs atema maongka ngutetogo.

Chelsea ama Strasbourg ya BlueCo kübok America nunger Todd Boehly aser Clearlake Capital meyong lir aser Sarr ya club ana tsüngda mezüngbuba

asayar ka melentepba asütsü.

Sarr densema taküm lemluwa Chelsea-i asayar pezübuba alizükogo. Parnoki Ipswich Town nungi Liam Delap pound million 30, Palmeiras nungi Estevao pound million 29 agi aser Sporting Lisbon nungi Dario Essugo pound million 18 agi alizükogo.

Osang ajanga ashiba agi, Chelsea pur Borussia Dortmund winger Jamie Gittens alitsü atema merangdar.

Season tembangba sülen winger Jadon Sancho-i Chelsea toktsür Manchester United-i meyipaogo. Pa loan nung asaya liasü.



Tseminyu District nung "Eradicate Drugs through Sports" omen nung ajemdaker Nasha Mukta Bharat Abhiyan Drugs Free Sports Tournament asayadar. Iba asayamung ya District Administration, District Level Nasha Mukta Bharat Abhiyan Committee aser Tesophenyu Group Student Union na longjemer ayongzükba lir. EAC Tseminyu, Mhathung Ngullie (NCS)-i June 7 nü GHS ground Tesophenyu nung NMBA campaign ya tenzüktsüogo.

## Chümoukedima District Football Association (CDFA) ketdangpur melentepogo

**Dimapur, Aami/June 9 (TYO):** Chümoukedima District Football Association (CDFA) executive committee tenure tembanga aruba sülen menden melentepba sentong May 31, 2025 nü takok ngua agiogo.

Team tasemba ya tir Sedevikho Angami aser General secretary-Thangboi Thomsong na lenisüba nung inyaksangshitsü, aser iba ajanga district nung football asaya achaayangba nung tapak tasen ka lapokogo.

Iba menden melentepba sentong ajanga inyakyim maneni aoba sayur aser lenir tasentemi lanurtem terenlok, infrastructure terenlok aser football tetoktepba renloka

odaktsütsü atema bendanga agüja inyaktsü nangzuka liasü.

Menden toktsüba team nem parnok mapa tajung asoshi tenüangsang agütsüogo. Parnok lenisüba nung CDFA-i local asayamungtem ayongzuka asaya-a grassroots jenjang nung asaya terenlok asoshi jenjang agiogo.

Sedevikho lenisüba nung team tasemba yagi taruba hopta ishika tsüngda CDFA tarutsü atema sentongtem sangdongtsü imlar.

Chümoukedima district nung aliba football asaya meimertem aser stakeholder temi lenir tasentem pusemogo aser district jenjang nung iba asaya renloka aotsü imlatepa atadar.

## ATP rankings: Jannik Sinner maneni temaba jenjang nung lir

**Aami/June 9, 2025**

**(Agencies):** French Open final nung tanabuba jenjang nung aliba asayar Carlos Alcaraz mekokaka Italy nunger asayar Jannik Sinner Hombarnü sayaba ATP world rankings nung maneni temaba jenjang nung lir.

Sinner shiba taoba küma French Open semi-final nung Alcaraz-i tsükdakja liasü, pa taküm final atongba sülen point 500 nguogo.

Spain nunger asayar Alcaraz taküm agi küm anabuba atonga French Open kokogo. Deobarnü final asaya nung Alcaraz-i 4-6, 6-7 (4), 6-4, 7-6 (3), 7-6 (10-2) agi Sinner madak takok ngua liasü.

Germany nunger asayar Alexander Zverev-i quarter-final nung Novak Djokovic mekokaka pa maneni tasembuba jenjang nung lir.

Arishi küm 38 tain Serbia nunger asayar Djokovic, shibai Sinner den semi-finals asayaba mapang set ka danga mekoki liasü, pa jenjang ka tejakdangi tua pongububa tongtetogo, saka maneni Jack Draper sülen lir.

Draper iba asayamung nung round of 16 nung Alexander Bublik-i tsükdaktsü, saka pa pezübubai tuogo, koba pa indang career nung tang tashi nung rankings tajungtiba lir.

Bublik shiba Sinner-i tsükdakja liasü, pa jenjang 19 tejakdangi tua 43buba nung lir.

Italy nunger asayar Lorenzo Musetti, shiba Alcaraz den semi-final asayaba mapang yirur masayatetsüsa aküm pa

tang mezüngbuba trokbubai tuogo.

Taylor Fritz, shiba mezüngbuba round nung tsüka liasü jenjang asem asepzuka lua tang tenetbuba nung lir aser kasa mapang nung America nungersa Tommy Paul tibubai tuogo.

French Open nung final ana tashi tonga asayar alisang Casper Ruud jenjang ti asepzuka lua tang 16buba nung lir. Taküm iba asayamung nung pa tanabuba round nung tsüka liasü.

### ATP Rankings: Top 20

- \* Jannik Sinner (ITA) 10,880
- \* Carlos Alcaraz (ESP) 8,850
- \* Alexander Zverev (GER) 6,385
- \* Jack Draper (GBR) 4,800 (+1)
- \* Novak Djokovic (SRB) 4,630 (+1)
- \* Lorenzo Musetti (ITA) 4,560 (+1)
- \* Taylor Fritz (USA) 4,485 (-3)
- \* Tommy Paul (USA) 3,510 (+4)
- \* Holger Rune (DEN) 3,440 (+1)
- \* Alex De Minaur (AUS) 3,285 (-1)
- \* Daniil Medvedev (RUS) 3,100
- \* Ben Shelton (USA) 3,080 (+1)
- \* Frances Tiafoe (USA) 3,015 (+3)
- \* Arthur Fils (FRA) 2,935
- \* Andrey Rublev (RUS) 2,920
- \* Casper Ruud (NOR) 2,905 (-8)
- \* Jakub Mensik (CZE) 2,322 (+2)
- \* Francisco Cerundolo (ARG) 2,285
- \* Grigor Dimitrov (BUL) 2,205 (-2)
- \* Ugo Humbert (FRA) 2,195 (+1).

## BILEMDANGANG

**"Sentongji kanga tongtibang masü saka sentong yanglutsüji tongtibang."**